



**Meeqqanut suli atualinningsunut perorsaaniqkut inerikkiartuutaasunik ulluunerani neqeroorutit pillugit inatsisartut inatsisaata nr. 16, 3. December 2012- imeersup allanngortinneqartariaqarnesoq pillugu apeqquteqaat aallaavigalugu oqallinnissamik siunnersuut. Meeqquerivinni meeraaq-qerivinnilu pisortat allaffissornerujussuarmik suliaqarnerisa oqilisaaf-figineqarnissaat qanoq ilillugu oqilisaaffigineqarsinnaava ?**  
(Inatsisartunut ilaasortaq Anthon Frederiksen, Partii Naleraq)

Apeqquteqaat tunngavigalugu oqallinnissamut siunnersuuteqartoq pitsaalluinnartumik isumassarsiamik saqqummiussaqaarpoq. Ima kusanartigaaq allaat Inatsisartut Inatsisaanni nr. 16-mi 3. december 2012-meersumi allaqqareerluni, inatsisip taassuma oqaasertai tamakkiisut nassaarineqarsinnaapput inatsit.gl-mi.

Inatsisip § 18-ani aamma § 19-ni aqutsisup perorsaasutut ilinniagaqarsimanissaanut piunasaqaatip sanioqqunneqarsinnaanera allassimavoq, allanik misilittagaqarneq uppersarneqarsinnaappat.

Takorloorparput ullumikkut piunasaqaatit sanioqqunneqarsinnaanerat pillugu aalajangersakkat kiisalu inatsisip oqaasertai allanneqarsimassasut nunami maani sulliviit angissusaat mikissusaalluunniit tunngavigalugu, inissaqartillugu sulisunik atorfinitsitsinnaaneq suliamik naammaginartumik naammassinnissinnaasumik.

Demokraatini isumaqarpugut apeqquteqaat aallaavigalugu oqallinnissamut siunnersuuteqartup allassiorfissornermut ilinniarsimasumik aqutsisumik atorfinitsitsisoqarsinnaanissaanut ujartugaa periarfissaareersoq.

Taamatut oqaaseqarluta Inatsisartut oqaaseqaateqarnissaannut siunnersuutip itigartinneqarnissaa inassutigaarput oqaaseqaatip siunertaa naammassineqareernikummat.